



Il Festival da la chanzun rumauntscha ho pudieu avair lö suot kundiziuns optimelas. Passa 2500 persunas haun visito l'occurrenza a Zuoz. In venderdi saira ho gieu lö ün chaunt aviert cun sustegn musical d'üna ghitarra ed üna gĩa (fotografia a dretta). Suotvart las victuras e'ls victuors da la concurrenza da cumposiziun 2022.

fotografias: Foto Taisch, Scuol e RTR

## Oxigen per la chanzun rumauntscha

**Il minz da Zuoz s'ho quista fin d'eivna passada transmüdo in ün areal da festival: que es gnieu chanto, tadlo e sto in cumpagnia – ün program accumpagnant cun occurrenz e concerts ho pissero cha passa 2500 persunas haun visito il Festival da la chanzun rumauntscha.**

Cuort auz l'avertüra dal Festival da la chanzun rumauntscha ho que in venderdi zievamezdi auncha do ün pitschen temporel. Ma a partir da lo d'eira be auncha ün'ora da pompa – scu scha'ls organisatuors vessan reservo ils trais pü bels dis da l'an pel festival. Zieva l'avertüra e divers concerts ho in venderdi saira gieu lö la vernissascha dal nov cudeschin da chaunt da l'Uni-un dals Grischs. Cun ün chaunt aviert i'l Hotel Engiadina ho il prüm di dal festival piglio sia fin.

In sanda bunura s'haun alura las famiglias pudieu participar ad ün lavuratori cul böt d'animer e da promover il chaunt in famiglia. Ün dals highlights dal program da la sanda es però sto l'experiment musical cha Gianna Olinda Cadonau e Ruedi Lutz haun fat al zievamezdi i'l Zuoz Globe. In ün'ura ho il cumponist scrit üna chanzun cul text d'üna poesia da la poetessa rumauntscha. I'l fratemp haun sün diversas plazzas i'l minz gieu lö concerts da furmazions rumauntschas.

### Üna chanzun nascha

Ün dals böts principels dal festival es dad ingrandir il repertoire da chanzuns rumauntschas. Sper la concurrenza da cumposiziuns – chi ho gieu lö in du-

mengia zievamezdi per quist scopo – es in sanda eir naschida üna chanzun a Zuoz. Ün'ura temp, ün clavazin, üna poesia ed ün cumponist – que d'eiran las premissas da l'experiment cha Gianna Olinda Cadonau e'l cumponist Ruedi Lutz haun fat.

Tuots duos nun haun auncha më fat part d'üna tel'ideja, nu s'haun auz auncha më vis, ma tuots duos d'eiran fich aviert per la sfida. Gianna Olinda Cadonau ho scu prüm prelet sia poesia. Causa cha Ruedi Lutz nu discuorra rumauntsch, ho'la fat üna versiun tudascha da la poesia. «Eau d'he aposta fat üna versiun tudascha, dimena üngüna traducziun dal text. Ushè d'he pruvo da der la listessa atmosfera a la poesia», ho dit Gianna Olinda Cadonau.

In seguit ho il cumponist piglio qualche plect e'ls ho pruvo da der tuns e melodias. Eir il public s'ho pudieu participar activmaing cun tscherner l'atmosfera da la chanzun e cun chanter tschertas passaschas da la nova cumposiziun. Ruedi Lutz ho cumponieu per mincha strofa da la poesia egnas melodias e las ho notedas directamaing. Grazcha ad ün beamer ho il public pudieu vzair cu cha la partitura nascha.

### Chatter las gütas melodias

«Normelmaing suni adüna be sulet in mia chambra a cumponer. Que es eir per me qualchosa insolit cha tuots guardan tiers», ho dit Ruedi Lutz. El ho adüna darcho declaro che ch'el fo, zieva as ho'l darcho pers i'l muond da las melodias e da la musica. El ho suno e tschercho motivs adattos per la nova cumposiziun. Gianna Olinda Cadonau ho traunteraint quinto davart sia ispiraziun e sia lavur, il cumponist d'eira i'l fratemp vi da noter la partitura u vi d'adatter il töch. «Hai, quist cò es que»,

as ho adüna darcho udiu a dir al cumponist, sch'el ho chatto üna melodia adattada.

Zieva mincha tact ho Ruedi Lutz pudieu pruver oura cun sustegn dal public musical cu cha la nova melodia tuna: voul dir cha las partecipantas e'ls partecipants haun let las notas dal beamer e chanto be subit a quatter vuschs. Ushè s'ho zieva 51 minuts furmeda pass per pass üna nova chanzun. In seguit ho il public auncha pudieu fer dumandas – e Ruedi Lutz ho declaro cu ch'el es gnieu a tschertas melodias. Eir cumbinaziuns da tuns ed armonias per crear üna tscherta atmosfera ho'l declaro.

### Ad hoc

L'experiment es gratagio e zieva bundant ün'ura lavur concentrada ho Ruedi Lutz mno il manuscrit illa cuort da la Chesa Robbi. Lo as vaiva drizzo aint Luzius Hassler cun sieu computer ed ün clavazin electronic. Interessentas ed interressents haun gieu la pussibiltad da guardar e tadler cu ch'el scriva giò cul computer manuscrits e tils metta in net. Eir la nova chanzun ho'l noto. E quart auz las tschinch as vaiva chatto ün cor ad hoc per la trener. Bundant trais uras zieva cha la chanzun d'eira gnida scritta i'l Zuoz Globe, l'ho il cor rapreschantada sün piazza da scuola.

### Dal Globe sün Plaz

La sanda saira ho il muond rumauntsch dal rock e pop gieu concerts i'l Zuoz Globe e pissero per divertimaint per las generaziuns pü giuvnas. Illa baslgia San Luzi haun parallelmaing ils ultims cors auncha gieu lur concerts. Traunter oter ho eir il Cantus Firmus Surselva chanto chanzuns dals Unicats Sweelinck. Que's tratta da chanzuns notedas i'l 18level tschientiner a Zuoz. Fin aint per la not es aun-

cha gnieu sto da cumpagnieu e chanto illa tenda da festa sün Plaz.

### Il grand finel

In dumengia ho alura gieu lö ün cult divin suot l'insaina dal chaunt rumauntsch religius. Zieva gianter sun gnidas rapreschantedas chanzuns da la concurrenza da cumposiziun. Cun ün chaunt cumünaivel ed ün act finel es il seguond Festival da la chanzun rumauntscha a Zuoz alura ieu a fin.

Il comitè d'organisaziun po guardar inavous sün ün festival cun success:

«Nus essans fich cuntaints scu cha tuot es ieu. Que d'eira ün evenimaint inschmanchabel e que da l'ora no, dal chaunt no e da la cumpagnia no. Cun tuot ils genres cha vaivans cò a Zuoz, vainsa pudieu der darcho ün pöin oxigen a la chanzun rumauntscha», ho dit Curdin Linsel, president dal comitè d'organisaziun a la fin dal Festival da la chanzun rumauntscha 2022. Il prossem festival varo lö l'an 2025 in Lumnezia, scu cha'd es gnieu dit in dumengia a Zuoz.

Martin Camichel/fmr

### Üna tschinquantina novas cumposiziuns rumauntschas

Avant trais ans, tar la prüma concurrenza a Trun, d'eiran gnidas inoltredas 35 chanzuns. Per la concurrenza da cumposiziun dal seguond Festival da la chanzun rumauntscha dal 2022 ho que do ün grand interess ed üna partecipaziun da record cun 49 cumposiziuns inoltredas.

Üna part essenziela dal festival es sto da promover cumposiziuns novas per cors rumauntschs. Perque ho il comitè d'organisaziun invidio a cumponistas ed a cumponists da crear cumposiziuns per inrichir la spüerta.

Quellas cumposiziuns sun alura gnidas valütedas d'üna giuria professunela e preschantedas düraunt il festival. Eir il public ho pudieu der ün premi per sia chanzun favorita da mincha categoria. Tuot las cumposiziuns as scumpartan süllas seguaintas categorias: 13 chanzuns per cor d'iffaunts, 23 chanzuns per cor maschdo, 13 chanzuns per cor viril.

Las seguaintas cumponistas e'ls seguaints cumponists haun guada-

gno ün premi i'l ram da la concurrenza:

**Cor masdo:** 1. premi: Cyrill Schürch (cun la chanzun «Fluras»); 2. premi: Flavio Bundi (cun la chanzun «Ei pluschigna»); 3. premi: Thomas Tschuor (cun la chanzun «O En»)

Premi dal public: Helena Reisp (cun la chanzun «I chatscha di»)

**Cor d'iffaunts:** 1. premi: Jan van der Roost (cun la chanzun «Miu Minmin»); 2. premi: Cyrill Schürch (cun la chanzun «I chatscha di»); 3. premi: Claudio Simonet (cun la chanzun «Il giat»)

Premi dal public: Nina Mayer (cun la chanzun «Mamma»)

**Cor viril:** 1. premi: Christoph Cajöri (cun la chanzun «Da capo»); 2. premi: David Lang (cun la chanzun «La prüm'amur»); 3. premi: Flavio Bundi (cun la chanzun «Himni alla primavera»)

Premi dal public: Flavio Bundi (cun la chanzun «Himni alla primavera»)

(fmr/cam)